

Ve chi, al plôf e al plovarà, in chescj dîs, ma o sin istes in stagjon di Vierte, e alore la rubriche dal “Cemût si disial” e va indevant cun altris trê rosis, che magari cuissà, no savìn simpri cemût che si disin par furlan.

Narciso



Comencin cul **narciso**, sî, flôr che al cjape il non dal grec e si riferis al so odôr, une vore fuart, che al inçussis. Podopo, sigûr, forsit e ven tal cjâf prin la figure mitologjiche, che aromai e a rivât a fâ diventâ il sostantîf un agjetîf, ma a no nus interesse come che si dîs par furlan, il nomenât **daffodil di Wordsworth**. Ben po, il narciso e je la **TARCETE** e ve chi in bande un biel plet di tarcetis. E mi racomandi che no us vegni tal cjâf di dîsi a un che si cjale simpri tal spieli che al è une tarcete, eh... in chel câs, al è un narcîs!

Tarassaco

E o nin indenant cuntune rose che no profume di sigûr come lis tarcetis, ma anzit, e puçe un pôc e duçj chei che a sedin stâts piçui e a zuiâ pai prâts a san ben che e ha un savôr une vore mareôs. Il **tarassaco**, o dente di leone o soffione par talian, che forsit tancj a clamin LATE o TALATE, e che a fâs lis rosis zalis che ben a cognossin, e che a chi nus plâs clamâ di plui **PISSECJAN**, non une vore colorît. Cualchidun, podopo, magari lu clame len di cjan, o tale dal boton, o magari cuissà. voaltris contecurtârs an savês altris...



Fiordaliso

Cemût si disial par furlan? Narciso, tarassaco, fiordaliso



E sierìn cuntune rose che cumò no je ancjemò in stagjon, ma che ancje plui indenant, purtrop, e stâ planc planc lant vie, di framieç i nestrìs cjamps di forment. O cjararìn dal fiordaliso, che o vês za viodût chi in bande e che par furlan si dîs **BARBURICE** e che e je une dês pocjis rosis blu par nature.